

華東卷

【上編】



地

方

志

人

物

傳

記

國家圖書館編

資料叢刊

北京圖書館出版社

【華東卷】

上編

第五八冊

地方志人物傳記資料叢刊

國
家
圖
書
館
編

北京圖書館出版社

第五十八冊目錄

(同治)鄱陽縣志

人物志	一
人物(一)	
勳業	
宦蹟	二九
忠節	八五
人物(二)	一一五
儒林	
質行	一四三
隱逸	二〇三
人物(三)	二一三
文苑	
武略	二四七
方技	二五九

寓賢	二六七
----	-----

(同治)德興縣志

人物志	二八一
名臣	
宦業	三三七
理學	三七三
儒林	三九三
文苑	四一七
忠義	四四一
孝友	五三一
善士	五六三
鄉賓	六一一
期壽	六二七
隱逸	六五五
方伎	六六一
寓賢	六七七

番陽縣志卷之十

人物志

嶽峙淵渟江山清絕蒼萃地靈懿鑠人傑彞鼎勲名閭閻
利澤批鱗犯顏嚼瓊濺血不愧閭修無虧昭質皓首窮經
壯心擊楫用備鴻儀潛甘蠖屈著書滿家過化存跡封鮓
資廉茹冰勵節歷述典型永垂軌則作人物志

人物一

勲業

宦蹟

忠節

殉難附

勲業

漢吳芮夫差後秦以芮爲番令甚得江湖間民心號曰番君
二世時天下初叛秦也六人英布以兵七千歸芮芮妻以
女因率越人舉兵以應諸侯沛公攻南陽遇芮將梅鋗與
偕攻析酈降之及項羽相王以芮率百越佐諸侯從入關

立芮爲衡山王都邾其將梅銷功多封十萬戶爲列侯項籍死高帝以銷從入武關故德芮徙爲長沙王都臨湘明年詔芮將兵定閩中薨謚曰文王子成王臣嗣薨子哀王回嗣英布反高帝擊走之回以姻故使人遺書誘布至番荏鄉田舍殺之見漢書黥布傳薨子共王右嗣薨子靖王差嗣孝文後七年薨無子國除初文王芮高祖賢之制詔御史長沙王忠其定著令孝惠高后封芮庶子二人爲列侯傳國數世絕班固贊曰昔高祖定天下功臣異姓而王者八國皆徼一時之權變以詐力成功咸得裂土南面稱孤見疑強大懷不自安事窮勢迫卒謀叛逆終於滅亡張耳以智全至子亦失國唯吳芮之起不失正道故能傳號五世以無嗣絕慶流支庶有以夫著於甲令而稱忠也崇祀邑名宦祠郡祀鄉賢

晉陶侃字士行早孤貧爲縣吏廬江太守張夔察侃爲孝廉
至洛陽數詣張華華與語異之除郎中尙書樂廣欲會荆
揚士人武庫令黃慶進侃於廣人或非之慶曰此子終當
遠到後舉侃補武岡令與太守呂岳有嫌棄官歸爲郡小
中正會劉宏爲荊州刺史辟侃爲南蠻長史討賊張昌破
之以軍功封東鄉侯陳敏之亂宏以侃爲江夏太守敏遣
其弟恢來寇武昌侃出兵禦之所向立破以母憂去職服
闋叅東海王越軍事江州刺史華軼表侃爲揚武將軍使
屯夏口元帝加侃奮威將軍遷龍驤將軍武昌太守流亡
者歸之盈路侃竭資賑給焉帝使侃擊杜弢破之賊增兵
來攻使朱伺等逆擊殺傷甚衆王敦表侃爲使持節甯遠
將軍南蠻校尉荊州刺史領西陽江夏武昌鎮沌口又移

入沔江遣朱侗等討江夏賊戮之王貢與杜曾舉兵反侃
爲所敗坐免官以白衣領職復率周訪等進軍入湘使都
尉楊舉爲先驅擊杜弼大破之數奏復侃官王貢來降弼
敗走進克長沙獲其將毛寶高寶梁堪而還王散深忌侃
功左轉廣州刺史以王廙爲荊州侃將鄭攀蘇溫馬儁等
不欲南行西迎杜曾以距廙散意攀承侃風旨將殺侃叅
軍梅陶長史陳頌言於散曰周訪與侃親姻如左右手安
有斷人左手而右手不應者乎散意解侃便夜發進至始
興杜宏與溫邵劉沉俱謀反侃擊破之以功封柴桑侯侃
在州無事輒朝運百甓於齋外暮運於齋內人問其故答
曰吾方致力中原過爾優逸恐不堪事太興初進號平南
將軍尋加都督交州軍事進號征南將軍開府儀同三司

王敞反詔侃以軍躡其後敞平遷侃都督荆雍益梁州諸軍事領護南蠻校尉征西大將軍荊州刺史侃性聰敏勤於吏職與人恭而近禮嘗語人曰大禹聖者乃惜寸陰至於眾人當惜分陰諸叅佐或以戲談廢事乃命取其酒噐蒲博之具悉投於江時造船木屑及竹頭悉令舉掌之咸不解所以會稽雪始晴廳事前猶溼以屑布地及桓温伐蜀以所藏竹頭作釘裝船其綜理微密皆此類也蘇峻作逆温嶠邀侃同赴朝廷推爲盟主部將彭世斬峻於陣峻弟逸復聚衆侃與諸軍斬逸於石頭改封長沙郡公加都督交廣甯七州軍事以江陵偏遠移鎮巴陵遣諮議叅軍張鋌討五谿夷降之郃默矯詔襲殺平南將軍劉乂輒領江州侃遣將軍宋夏陳修率兵據湓口以大軍繼進默將

宗侯縛默父子詣降侃斬默等詔侃都督江州領刺史侃
移鎮武昌命張夔子隱爲叅軍范逵子珧爲湘東太守辟
劉宏曾孫安爲掾屬凡微時所荷一殮咸報遣子斌與南
中郎將桓宣西伐樊城走石勒將郤敬使兄子臻竟陵太
守李陽等共破新野遂平襄陽拜大將軍劍履上殿入朝
不趨讚拜不名上表固讓疾篤又上表遜位以後事付右
司馬王愷期侃輿車出臨津就船明日薨於樊谿年七十
六諡曰桓尚書梅陶曰陶公機神明鑒似魏武忠順勤勞
似孔明陸抗諸人不能及也謝安每言陶公雖用法而恒
得法外意其爲世所重如此子十七人洪瞻夏旗斌稱範
岱見舊史範最知名太元初爲光祿勳

晉書

陶臻侃兄子字彥遐有勇略智謀江州刺史華軼表侃爲揚

武將軍使屯夏口又以臻爲叅軍軼與元帝素不平臻懼難作託疾而歸白侃曰華彥夏有憂天下之志而才不足且與琅邪不平難將作矣侃怒遣臻還軼臻遂東歸於帝帝見之大悅命臻爲叅軍後賜爵當陽亭侯咸和中爲南郡太守領南蠻校尉卒官贈平南將軍謚曰肅同上臻弟輿與侃子瞻別見忠節

宋熊本字伯通慶厯間進士判撫州軍事遷秘書丞知建德縣提舉淮南常平檢正中書禮房事熙寧間瀘川羅晏夸叛詔本察訪梓夔兩路本曰彼能擾邊者以十二村之衆乃誘其酋領誅之又大破柯陰諸夸皆從風而靡願爲漢官奴遷刑部員外郎集賢殿修撰通判司農寺神宗勞之曰卿不傷財不病民一旦去百年之患檄奏詳明可嘉也

河湟初復以本爲秦鳳路都轉運使奏省冗官百四十員
歲減浮費數十萬渝州南川獠人木斗叛詔本安撫夔路
本計破其黨木斗氣索舉溱州地五百里來歸爲四砦九
堡建南平軍除知制誥判司農寺故事除知制誥者皆先
召試帝曰本之文朕所自知元豐中厯知滁州廣州召拜
工部侍郎會宜州蠻擾邊除龍圖閣待制知桂州至則溪
洞酋長請選將練士兵以代戍守益市馬以足騎兵宜州
遂無事召爲吏部侍郎以疾乞補外除龍圖閣待制知洪
州尋徙杭州未幾卒有文集奏議共八十卷孫彥明字德
將寓樂平金山鄉紹興初宰永豐洞民唐小隆據險犯順
彥明奉檄討之將遁去逃卒語泄彥明遇害大帥胡世將
表聞贈朝請郎官其子誥

東都事略

彭汝礪字器資舉進士第一歷幕府十年處之澹如王安石
得所著詩義善之以爲國子直講擢太子中允尋改監察
御史裏行首陳正本任人等十事指摘利害多人所難言
者王中正李憲臨邊汝礪曰漢唐以兵付中人多致敗事
神宗咄之汝礪拱立不動伺問復言神宗卒爲改容出爲
江西轉運判官陞辭言今不患無將順之臣患無諫諍之
臣不患無敢爲之臣患無敢言之臣久之代還爲京西路
提點刑獄元祐中拜中書舍人會吳處厚繳進蔡確詩諫
官交章請治汝礪曰此羅織之漸也上疏論列已而確有
謫命汝礪遂罷知滁州召爲兵部侍郎徙刑部會有巨獄
汝礪以爲不可殺與執政異徙禮部又徙吏部紹聖初進
尚書章惇以紹述熙豐爲事汝礪耿介不爲所容言者謂

附會劉摯罷爲寶文閣直學士知成都府以疾辭知江州卒年五十四遺表云土地已有餘願撫以仁財用非不饒願節以禮佞人初若可悅而其患在後忠言初若可惡而其利甚溥忠義之氣至死不衰所著有易詩義各十卷奏議詩文五十卷號鄱陽集弟汝霖厯官顯謨閣待制汝方另有傳見忠節

陶節夫字子禮晉大司馬侃之裔以進士起家爲廣州錄事叅軍楊元寇暴山谷間捕繫獄屢越以逸且不承爲盜旣累年節夫詰以數語元遂吐服將赴市曹與諸囚訣曰陶公長者雖死可無憾知新會縣廣守章案重其才案帥涇原辟入府崇寧初爲講議司檢討官進虞部員外郎遷陝西轉運副使徙知延安府以招降羌功加集賢殿修撰築

石堡等四城石堡以天澗爲隍可趨唯一路夏人審粟其間以千數旣爲宋有其首驚曰漢家取我金窟竭亟發鐵騎來爭節夫分部將士禦之斬獲統軍以下數十百人夏人度不可得斂兵退擢顯謨閣待制龍圖閣直學士方議城銀州謀告夏人已東節夫料必西趨涇原遣裨將耿端彥疾驅至銀州五日城成夏人果從涇原至則城備已固遂遁去進樞密直學士尋領經制環慶涇原河不邊事言今旣得石堡又城銀州西夏洪宥皆在吾顧盼中橫山之地十有七八興州巢穴淺露直可以計取遂陳取興靈之策加龍圖閣學士會朝議罷經制司且棄所城地節夫乃求內郡徙洪州改江甯府厯青秦二州知永興軍數月卒追復龍圖閣學士

洪适字景伯皓長子也皓使朔方适年甫十三能任家事以皓出使恩補修職郎紹興十二年與弟遵同中博學宏詞科高宗曰父在遠方子能自立此忠義報也遂除敕令所刪定官後三年弟遵亦中是選由是三洪文名滿天下改秘書省正字甫數月皓歸忤秦檜出知饒州适亦出爲台州通判垂滿皓謫英州适後論罷往來嶺南省侍者九載檜死皓還道卒服闋起知荆門軍改知徽州尋提舉江東路常平茶鹽首言役法不均之弊升尙書戸部郎中總領淮東軍馬錢糧孝宗卽位海州解圍符離用兵饋餉繁夥适究心調度供億無闕遷司農少卿隆興二年召貳太常兼權直學士院上欲除諸將環衛官詔討論其制适具唐及本朝沿革十一條上之除中書舍人時江淮羽檄皆至

書詔填委咨訪酬答率稱上旨自此有大用意金旣尋盟
首爲賀生辰使得其要領以歸乾道元年五月遷翰林學
士仍兼中書舍人秦埧久廢忽予祠适奏曰李林甫死後
諸子皆流配嶺南秦檜稔惡自斃不肖之孫官職仍舊可
謂幸矣官觀雖小埧得之則人以爲除用之漸恐檜黨牽
連而進其命遂寢六月簽書樞密院事上諭叅政錢端禮
虞允文曰三省事與洪适商量東西府始同班奏事八月
拜叅知政事十二月拜尙書右僕射同中書門下平章事
兼樞密使未幾乞歸卒謚文惠

洪遵字景巖皓仲子以父蔭補承務郎與兄适同賜進士出
身高宗以皓遠使擢爲秘書省正字中興以來詞科中選
卽入館自遵始皓南還與朝論異出守遵遂乞外通判常

婺越三州復入爲正字八月兼權直學士院湯鵬舉副臺
端密薦爲御史方賜對而父訃聞免喪召對極陳父寃曰
先臣與龔璫同出疆璫仕於劉豫以妄殺兵官爲豫所誅
而秦檜贈以節旄擢用其子先臣拒金人之命留十五歲
乃得歸顧南竄嶺外臣兄弟屏跡在外檜不分忠逆如此
高宗悉爲道謗語所起且曰卿再登三館嘗典書命今以
修注處卿遂拜起居舍人奏乞以經筵官除罷及封章進
對宴會錫予講讀問答等事萃爲一書名之曰邇英記註
其後乾道間又有祥曦殿記注實自遵始遷起居郎兼權
樞密院都承旨舊制修注官經筵官許留身奏事而近例
無有遵奏請復舊制且言起居注未修者十五年請除見
修月進外每月帶修皆從之二十九年拜中書舍人時勲